



册府元龟

卷之百二十五
至二十七



13
849
44



明 4 3
849
44



册府元龜

淮南李嗣京參閱

西極文翔鳳訂正

豫章黃國琦較釋

帝王部

一百二十五

料敵

夫王者之兵先勝而後戰蓋夫慮敵而動見可而進
斯謂出奇無窮伐謀為上者也
眇觀載藉三代而下
撥亂經綸之後仗義征代之君何嘗不制勝於廟堂
之中決幾於萌朕之表沉謀秘略先天奪人臨事對

册府元龜

帝王部

卷之二十五

敵瑋表知裏用能救元元之命定天下之業夷兇靖
難令聞長世自非英識內蘊雄威兼厲洞察情偽練
達戎昭智慮造乎精微規摹極於宏遠又曷能臻此
哉

漢高祖初爲漢王二年四月西過梁地至虞謂謁者
隨何曰公能說九江王布使奉兵畔楚項王必留擊
之得留數月吾取天下必矣隨何往說布果使畔楚
八月遣酈食其說魏王豹豹不聽乃以韓信爲左丞
相與曹參灌嬰俱擊魏食其還漢王問魏大將誰也
對曰柏直王曰是口尚乳臭不能當韓信騎將誰也

曰馮敬曰是秦將馮無擇子也雖賢不能當灌嬰步
卒將誰也曰項它曰不能當曹參吾無患矣

武帝元狩四年匈奴入右北平定襄殺略漢千餘人

其明年帝與諸將議曰翁侯趙信爲單于畫計常以

爲漢兵不能度幕輕留言輕易漢君故留而不去也
一日謂漢兵不能輕入而久

留也今大發卒其勢必得所欲帝令大將軍青驃騎將
軍去病出塞大斬首虜

後漢光武建武四年賊帥劉永將董憲時在郟其將
賁休舉蘭陵城降憲聞之自郟圍休時蓋延及龐萌
在楚請往救之帝勅曰可直往擣郟則蘭陵必自解

延等以賁休城危遂先赴之憲逆戰而陽敗延等遂退逐因拔圍入城明日憲大出兵合圍延等懼遽出突走因往攻郟帝讓之日間欲先赴郟者以其不意故耳今既奔走賊計已立圍豈可解乎延等至郟果不克而董憲遂拔蘭陵殺賁休

吳漢征公孫述攻拔廣都遣輕騎燒成都市橋武陽以東諸小城皆降帝戒漢曰成都十餘萬衆不可輕也但堅據廣都待其來攻勿與爭鋒若不敢來公轉營迫之須其力疲乃可擊也漢乘利遂自將步騎一萬餘人進逼成都去城十餘里阻江北爲營作浮橋

使副將武威將軍劉尚將萬餘人屯於江南相去二十餘里帝聞大驚讓漢曰比叅公千條萬端何意公臨事勃亂既輕敵深入又與尚別營事有緩急不復相及賊若出兵綴公以大衆攻尚尚破公即敗矣幸無它者即引兵還廣都詔書未到述果使其將謝豐袁吉將衆十餘萬分爲二十餘營竝出攻漢使別將萬餘人劫劉尚使不得相救漢與大戰一日兵敗走入壁豐因圍之

隗囂據天水帝命將征之帝聞得略陽甚悅左右惟帝數破大敵今得小城何足以喜然帝以略陽囂所

依阻心腹已壞則制其支體也

朱浮為幽州牧時彭寵反攻浮涿郡太守張豐亦反
 浮以為天子必自將兵討之而但遣鄧隆助浮浮以
 為帝怠於敵不能救之乃上疏詔報曰往年赤眉跋
 扈長安吾策其無穀必東果來歸降今度此反虜勢
 無久全其中必有內相斬者今軍資未充故須後麥
 耳後豐寵竝自敗

初彭寵攻朱浮於薊帝使游擊將
 軍鄧隆救薊隆軍路南浮軍雍故
 遣吏奏狀帝讀激怒謂使吏曰營相去百里其勢豈
 可得相及比若還北軍必敗矣寵果盛兵臨河以拒
 隆又別發輕騎三千襲其後大
 破隆軍浮遠遂不能救引而去

鄧禹遣馮愔宗歆守桐邑二人爭權相攻愔遂殺歆

因反擊禹禹遣使以聞帝帝問使人帝所親愛為誰
 對曰護軍黃防帝度愔防不能久和勢必相忤因報
 禹曰縛馮愔者必黃防也乃遣尚書宗廣持節降之
 後月餘防果執愔將其眾歸罪

魏太祖時田豐為袁紹別駕逢紀憚其亮直數讒之
 於紹紹於是有害豐之意後太祖聞豐不從戎喜曰
 紹必敗矣及紹奔遁復日向使紹用其別駕計尚未
 可知也

文帝黃初二年鎮西將軍曹真命眾將及州郡兵討
 破叛胡治元多盧水封賞等斬首五萬餘級獲生人

十萬羊一百一十一萬口牛八萬河西遂平帝初聞
胡決水灌顯美謂左右諸將曰昔隗囂灌略陽而光
武因其疲弊進兵滅之今胡決水灌顯美其事正相
似破胡事今至不久旬日破胡告檄到帝大笑曰吾
策之於帷幕之內諸將奮擊於萬里之外其相應若
合符契前後克獲虜未有如此也

三年孫權破劉備於夷陵初帝聞備兵東下與權交
戰樹柵連營七百餘里謂群臣曰備不曉兵豈有七
百里營可以拒敵者乎苞原隰險阻而爲軍者爲敵
所擒此兵忌也孫權上事今至矣後七日破備書到

明帝初卽位黃初七年八月孫權攻江夏郡太守文
聘堅守朝議欲發兵救之帝曰權習水戰所以取下
船陸攻者幾掩不備也今已與聘相持夫攻守勢倍
終不敢久也先時遣治書侍御史荀禹慰勞邊方禹
到於江夏發所經縣兵及所從步騎千人乘山舉火
權退走之

太和二年正月蜀大將諸葛亮攻邊天水南安安定
三郡叛應亮是時朝臣未知計所出帝曰亮阻山爲
固今者自來旣合兵書致人之術且亮貪三郡知進
而不知退今因此時破亮必也乃部勒兵馬步騎五

萬拒亮遣大將曹真都督關右竝進兵右將軍張郃擊亮於街亭大破之亮敗走三郡平

五年三月蜀將諸葛亮攻天水詔司馬宣王拒之初亮出議者以爲亮軍無輜重糧必不繼不擊自破無爲勞兵或欲自芟上邽左右生麥以奪軍食帝皆不從前後遣兵增宣王軍又勅使護麥宣王與亮相持賴得此麥以爲軍糧

青龍元年六月保塞鮮卑大人步度根與叛鮮卑大人軻比能私通并州刺史畢軌表輒出軍以外威比能內鉞步度根帝省表曰步度根已爲比能所誘有

自疑心今軌出軍適使二部驚合爲一何所成鍾乎促勅軌已出軍者慎勿越塞過句注也比詔書到軌已進軍屯陰館遣將軍蘇尚董弼追鮮卑比能遣子將千餘騎迎步度根部落與尚弼相遇戰於樓煩二將沒步度根部落皆叛出塞與比能合寇邊驍騎將軍秦朗將中軍討之虜乃走漠北

二年四月諸葛亮出斜谷屯渭南司馬宣王率諸軍拒之詔宣王但堅壁拒守以挫其鋒彼進不得志退無與戰久停則糧盡虜略無所獲則必走走而追之以逸待勞全勝之道也

景初二年正月帝議遣司馬宣王討公孫淵發卒四萬人議臣皆以爲四萬兵多役費難供帝曰四千里征伐雖云用奇亦當任力不可稍計役費遂以四萬人行及宣王至遼東霖雨不得晴故羣臣或以爲淵未可卒破宜詔宣王還帝曰司馬懿臨危制變擒淵可計日待也卒皆如所策

九月蜀陰平太守廖惇反攻守善羗侯嚴葦營雍州刺史郭淮遣魏廣太守王贊南安太守遊奕將兵討惇淮上書贊奕等分兵夾山東西圍雒賊表破在旦夕帝曰兵法惡離促詔淮勅奕諸別營非要處者還

令據便地詔勅未到奕軍爲惇所破贊爲流矢所中死

晉宣帝初爲魏國軍司馬時蜀將關羽圍曹仁於樊于禁等七軍皆沒而仁圍甚急是時漢帝都許昌魏武以爲近敵欲徙河北帝諫曰禁爲水所沒非戰守之所失於國家大計未有所損而使遷都旣示敵以弱又淮沔之人大不安矣孫權劉備外親內疎關羽之得意權所不願也可喻權使令倚其後則樊圍自解魏武從之權果遣將呂蒙西襲公安拔之羽遂爲蒙所獲明帝卽位以帝爲魏驃騎將軍明帝問吳蜀

二虜宜討何者爲先對曰吳以中國不習水戰故敢散居東關凡攻敵必扼其喉而椿其心夏口東關敵之心喉若爲六軍以向皖城引權東下爲水戰軍向夏口乘其虛而擊之此神兵從天而墮破之必矣天子竝然之魏太和四年蜀諸葛亮入攻帝爲驃騎大將軍破亮于祁山鹵城時軍師杜襲督軍薛悌皆言明年麥熟亮必來攻隴右無穀宜及冬豫運帝曰亮再出祁山一攻陳倉挫衄而反縱其後出不復攻城當求野戰必在隴東不在西也亮每以糧少爲恨歸必積穀以吾料之非三稔不能動矣又諸葛亮使至

帝問曰諸葛公起居何如食可幾米對曰三四升次問政事曰二十罰已上皆自省覽帝旣而告人曰諸葛孔明其能久乎竟如其言正始三年吳將諸葛恪屯皖邊鄙若之帝爲太傅督諸軍南征時帝欲自擊恪議者多以賊據堅城積穀欲引致官兵今懸軍遠以其救必至進退不易未見其便帝曰賊之所長者水也今攻城以觀其變若用其所長棄城奔走此爲妙勝也若敢固守湖水冬淺船不得行勢必棄水相救繇其所短亦吾計也帝軍次于舒恪焚燒積聚棄城而遁五年大將軍曹爽伐蜀帝謂夏侯玄曰春秋

責大德重昔武皇帝再入漢中幾至大敗君所知也
今興平路勢至險蜀已先據若進不獲戰退見微絕
覆軍必矣將何以任其責玄懼言於曹爽引軍退費
禕進兵據三嶺以截爽爽爭嶮苦戰僅乃得過所發
牛馬運轉者死失略盡羌胡怨嘆而關右悉虛耗矣
景初二年遼東太守公孫淵反時帝爲太尉都督雍
州徵帝詣京師天子曰此不足以勞君事欲必克故
以相煩耳君度其作何計對曰棄城預走上計也據
遼水以拒大軍次計也坐守襄平此成禽耳天子曰
其計將安出對曰惟明者能深度彼已預有所棄此

非其所及也今懸軍遠征將謂不能持久必先距遼
水而後守此中下計也天子曰往還幾何對曰往百
日還百日攻百日以六十日爲休息一年足矣

文帝魏正始中爲散騎常侍大將軍曹爽之伐蜀也
以帝爲征蜀將軍副夏侯玄出駱谷次于興勢蜀將
王林夜襲文王營文王堅卧不動林退帝謂玄曰費
禕以據險拒守進不得戰攻之不可宜亟旋軍以爲
後圖爽等引旋禕果馳兵趣三嶺爭險乃得過

嘉平四年爲安東將軍蜀將姜維攻隴右揚聲欲攻
狄道以帝行征西將軍次長安雍州刺史陳泰欲先

敵據狄道帝曰姜維攻羗收其盾任聚穀作邸閣訖而復轉行至此正欲了塞外諸羗爲後年之資耳若實向狄道安肯宣露令人知今揚聲言出此欲歸也維果燒營而去甘露二年揚州刺史諸葛誕反帝以大將軍討於淮南進軍丘頭吳使文欽唐咨全端等來救誕諸將逆擊不能禦吳將朱異帥輕兵至藜漿異爲石苞周泰所擊敗走吳人殺異帝曰異不得至壽春非其罪也而吳人殺之適以壽春而堅誕意使其猶望救耳若其不爾彼當突圍決一旦之命或謂大軍不能久省食減口冀有他變料賊之情不出此

三者今當多方以亂之備其越逸此勝計也因命合圍分遣羸疾就穀淮北廩軍士大豆五三升欽聞之果喜帝愈羸形以示之多縱反間揚言吳救方至誕等益寬恣食俄而城中乏糧石苞王基并請攻之帝曰誕之逆謀非一朝一夕也聚糧完守外結吳人自謂足據淮南欽旣同惡相濟必不便走今若急攻之損遊軍之力外寇卒至表裏受敵此危道也今三叛相聚於孤城之中天其或者將使同戮吾當以長策縻之但堅守三面若賊陸道而來軍糧必少吾以遊兵輕騎絕其轉輸可不戰而破外賊外賊破欽等必

成擒矣

後魏道武皇始元年討慕容寶進運中山引騎圍之
帝謂諸將曰朕量寶不能出戰必當憑城自守偷延
日月急攻則傷士久守則費糧不如先平鄴信都然
後還取中山於計爲便若移軍遠去寶必散衆求食
民間如此則人必離阻攻之易尅諸將稱善宣武時
任城王澄爲鎮南大將軍伐梁將攻鍾離詔曰鍾離
若食盡三月已前固有可尅如至四月淮水泛長舟
行無礙宜善量之前事捷也此實將軍經略勲有常
焉如以水盛難圖亦可爲萬全之計不宜昧利無成

以貽後悔梁冠軍將軍張惠紹遊擊將軍殷暹驍騎
將軍趙景悅龍驤將軍張景仁等率衆五千送糧鍾
離澄統軍王足劉思祖等邀擊惠紹等大破之獲惠
紹殷暹景仁及其屯騎較史文淵等軍王已上二十
七人旣而遇雨淮水暴長引歸壽春還旣狼狽失兵
四千餘人頻表解州帝不許有司奏軍還失路奪其
開府又降三階

後周太祖初爲後魏尙書僕射闕西大行臺時魏帝
方圖齊神武太祖乃傳檄方鎮謂諸將曰高歡雖智
不足而詐有餘今聲言欲西其意在入雒吾欲令寇

雒率馬步萬餘自涇州東引王羆率甲士一萬先據華州歡若西來王羆足得抗拒如其入雒寇雒卽襲汾晉吾便速駕直赴京邑使其進有內顧之憂退有被躡之勢一舉大定此爲上策衆咸稱善

永熙二年七月太祖率衆發自高平前軍至於弘農而齊神武稍逼京邑魏帝親總六軍屯於河橋令左衛元斌之領軍斛斯椿鎮武牢遣使告太祖太祖謂左右曰高歡數日行八九百里况兵者所忌正須乘便擊之而主上以萬乘之重不能決戰方緣津據守且長河萬里扞禦爲難若一處得度大事去矣卽以

大都督趙貴爲別道行臺自蒲坂濟趣昇州遣大都督李賢將精騎一千赴雒陽會斌之與斛斯椿爭權不協斌之遂棄椿還紹帝云高歡兵至帝遂從雒陽率輕騎入關後帝爲大將軍大統三年旣平弘農因館穀五十餘日時戰士不滿萬人聞齊神武將渡乃引軍入關齊神武遂渡河逼華州刺史王羆嚴守知不可攻乃涉雒軍於許原西太祖據渭南徵諸州兵皆會乃召諸將謂之曰高歡越山渡河遠來至此天亡之時也吾欲擊之何如諸將咸以衆寡不敵請待歡更西以見其勢太祖曰歡若得至咸陽人情轉騷

擾今及其新至便可擊之卽造浮橋於渭令軍人齎三日糧輕騎渡渭輜重自渭南夾而西冬十月壬辰至沙苑距齊神武軍六十餘里神武聞太祖至引軍來會癸巳旦候騎告齊神武軍且至太祖召諸將謀之李弼曰彼衆我寡不可平地置陳此東十里有渭曲可先據以待之遂進軍衆至渭曲皆水東西爲陳偃於葭蘆中間鼓聲而起申時齊神武至望太祖軍少競馳而進不爲行列總萃於左軍兵將交太祖鳴鼓士皆奮起于謹等六軍與之合戰李弼等率鐵騎橫擊之截其軍爲二遂大破之斬六千餘級臨陳降

者二萬餘人齊神武夜遁追至河上復大尅獲

唐太宗初爲唐國內史總兵十萬徇東都兩月而旋帝籌之曰賊見吾還必相追躡設三伏以待之俄而隋段達學萬餘人自後而至帝發伏以擊之賊師大敗親自追奔至於城下斬四千餘級又高祖武德元年十一月降薛仁果於折撫城虜其衆數萬隴右悉平初帝師次高撫賊堅不動諸將咸稱戰帝曰我士卒新經挫衄銳氣猶少賊以勝自驕必輕進好鬪我且堅壁以折之待其氣衰而後奮擊可一戰而破此萬全之計也因令軍中曰敢言戰者斬相持者久之

帝曰可戰矣夜遣將軍麗玉擊賊驍將宗羅侯兩軍
酣戰帝以勁兵出賊不意擊大破之乘勝遂逼折撫
城竇抗等執馬苦諫曰賊主猶據堅城雖破羅侯未
可卽逐請按兵以候其變帝曰筭之久矣今日舅不
須言破竹之勢不可失也大軍已敗餘衆何足爲虞
凶魁之計盡於此矣遂率軍而進至夜半軍臨賊城
守陴者皆亂爭自投而下仁杲窮蹙開門請降頓顙
於道左高祖聞之大悅遣內史舍人崔確齎錦袍馳
賚有功者

貞觀二年九月己未突厥寇邊朝臣或言宜修古長
城發人乘塞者帝曰頡利國中盛夏降霜五日竝出
三月連明赤氣滿野鬼哭於路而不修德暴虐滋甚
此所謂不畏天時也遷徙無嘗六畜多死所謂不愛
地利也其俗死則焚之今起墳墓背其父祖之命此
所謂不敬鬼神也突利卽其兄子不能輯睦屢相懷
貳此所謂不和民人也有此四過能不亡乎以朕察
之殆將不遠當爲公等廓定沙場安用勞民遠修亭
障也

十五年十一月薛延陀攻李思摩十部帝詔兵部尙
書李勣爲朔州道行營總管率兵六萬騎千二百屯

朔州右衛大將軍李大亮爲靈州道行軍總管率兵四萬騎五千屯靈武右屯衛大將軍張士貴率兵一萬七千爲慶州道行軍總管出雲中涼州都督李襲譽爲涼州道行軍總管以經略之諸將奉辭帝誠之曰延陁負其兵力踰漠而來途經數千馬已疲瘦夫用兵之道見利速進不利速退其掩思摩不能疾擊旣入長城又不能速退吾先勅思摩燒薙秋草糧食日盡野無所獲頃者偵人來云其馬畜齧噉林木枝皮略盡卿等犄角思摩不須前戰俟其將退一時奮擊制勝之舉也又遣右屯衛將軍姜行本率左右飛

騎及左右衛引強者數千人受李勣節度十二月甲辰李勣擊延陁破之

十八年九月高昌破焉耆而虜其生口七百初王師之滅高昌也盡以還之焉耆王背德懷二歸誠於咄陸可汗詔安西都護郭孝恪伺機便以討之辛卯帝謂侍臣曰孝恪近奏稱率兵三千以八年十一月詣焉耆二十日應至必以二十二日破之朕計其行程使人今日應到言未畢驛騎至云郭孝恪已破焉耆十九年帝征遼次安市城六月丁巳高麗靺鞨之衆十五萬來援安市城帝謂侍臣曰高延壽之來也其

策有三若引兵直前連安市城以爲壘據高山之險食城山之粟兼縱靺鞨寇吾牛馬攻之則不可卒下欲歸則泥濘爲滯此其上策若抽城中之人與之宵遁此其中策若不量其能近城列陣將與吾交鋒者此其下策卿其觀之是必用下策若得縱兵決戰所謂成擒者也賊中有一對盧年習事謂延壽曰吾聞中國大亂英雄竝起秦王聖武所向無敵遂平天下南面爲帝北夷請服西戎獻款今者傾國而至唐兵之壯健者悉來其鋒不可當也今爲計者莫若填兵不戰曠日持久分遣驍雄斷其餽運不過旬日軍糧

必盡求戰不得欲歸無路此不戰而取勝也延壽不從引軍直進遣馬候之云去安市城四十里帝以爲兵家之勢以逸待勞猶慮其低徊不至詔左衛大將軍阿史那社爾總突厥千騎以誘之誠曰鋒交而佯北其必乘爾而來也高麗常令靺鞨居前社爾與之纔交而退高麗相謂曰此易與耳競馳進軍於安市城東南八里依山麓而陳帝召長孫無忌及侍臣將軍等謂曰夷兵旣至塵埃亘數十里彼衆我寡卿等所知國家猛將謀臣竝從朕在此破賊萬全之策云何無忌奏稱古來帝王亦有以干戈靜亂而臨天下

者多委將帥身非經略陛下往時平定海內年踰成
童莫不披堅執銳躬先士伍翦除千紀救蒼生之命
鴻名遠震海外咸服今所從行將士多是幕府舊人
雖遠涉夷鄉而喜陪神武橫戈思敵人百其戰古人
云將戰必觀士卒之情臣適行經諸營衛士等聞高
麗已至無不抽刀結旆喜見於色往平王世充及竇
建德等臣皆從征至於奇謀異筭多出睿旨用陛下
妙筭無不就擒偶達成規必致負敗今陛下親臨遼
碣擐甲辰鄉滅高麗之機在此一舉臣等愚短破陣
萬全之策不敢克當特乞陛下指縱臣等奉以行事

帝笑謂曰卿等既推筭於朕朕當爲君料量因與無
忌李勣等翼數百騎乘高以觀之見其山川可以用
奇兵處遣使給延壽曰我以爾強臣篡弒故來問罪
卽欲交戰非吾本意天子入境芻粟不能於中國轉
運破爾數城以取廩食禮苟修則所失必復矣延壽
信之竟夕而俟帝夜召文武躬自指麾遣李勣步騎
一萬五千於賊西嶺爲陳無忌率將軍牛進達等精
兵一萬一千以爲奇兵自山北於狹谷出以衝其後
帝自率步騎四千潛鼓角偃旌幟趣賊營北高峯之
上勅諸將聞鼓角聲而齊進因令所司張受降幕於

朝堂之側曰明日午時納降虜於此矣遂率軍而進
戊午延壽獨見李勣兵欲與戰帝遙望無忌軍塵起
命鼓角竝作旌幟齊舉賊衆大懼將分兵承之而其
陣已亂時有雷電助我軍威李勣率步卒一萬擊之
延壽衆退長孫無忌縱兵乘其後帝又引軍臨之賊
因大潰斬首三萬餘級延壽等率其餘寇依山自保
迴望我軍擊其黨類悲號相召其聲甚哀於是詔無
忌勣等引兵圍之無忌徹川梁以斷其歸路帝按軍
行觀賊營壘謂侍臣曰高麗傾國而來存亡所繫一
麾而敗天祐我也因下馬再拜以謝天已未高延壽

高惠貞率三萬六千八百人請降帝營於安市城南
令李勣攻安市城甚急城中每見帝旛旗必乘城鼓
噪帝怒甚李勣曰請破城之日男子盡坑城內聞之
人皆死戰詔令江夏王道宗督兵築土山攻其城東
南隅高麗亦禪城增雉以相抗詔遣衛兵分番攻之
日六七合抱石撞車壞其樓雉城中隨有隳壞卽立
木柵忽聞城中雞彘驚鳴帝謂李勣曰圍城多日城
中煙火日微今雞猪甚喧此其饗士也卿宜嚴兵虜
今夜當出矣及夜高麗數百人縋城而下帝聞之從
四五騎至城下召兵急擊斬首數十級高麗奔退

後唐莊宗初爲晉王公子梁兵侵劉守文於滄州攻甚急幽州劉仁恭遣使乞師使車結轍武皇恨其翻覆不時許之帝白曰此吾復振之道也不得以嫌怨介懷且九分天下朱氏今有六七趙魏中山在他庶下賊所憚者仁恭與我合勢興復本朝是以逞其兵威將令弭服絕彼結託使我勢孤然後顯行逼奪賊之成敗我之興衰繫此一舉不可失也武皇乃徵兵于燕攻取滌州及軍之起也居浹旬杳無音驛物議憂之帝謂賓友曰我聞朱氏猜嫌丁會久矣斯人嘗不自安如援兵未至必來歸我旣而丁會果以城降

及爲晉王

天祐十三年

唐哀帝天祐元年後是朱梁建國改號開平其莊宗只稱天祐

與梁將

劉鄩戰于洹水數日兵不交寂若無聲我遣邏騎覘之無斥候者摩壘而觀之則營中有班馬之聲而無煙火之狀望其壘鳥止於上又有旗幟循堦往來覘者還以事聞帝曰我聞劉鄩一步百變營外不見賊軍必以詭計悞我命覘者入其城中乃以芻爲人縛旗上以驢負之循堦而行故旗幟嬰城不息問城中羸老者曰軍去已二日矣覘者還以聞帝曰劉鄩使兵短於決戰愛乘人不備謂我大軍一盡於此料晉

陽城內全無備兵必欲出奇絕我根本虛營設詐懼有追兵計彼行程纔及山下旣而有人自賊中來言劉鄩兵趣黃澤矣帝遽發奇軍追之

十五年大舉赴汴州帝問戰備周德威曰賊軍倍道而來未成營壘我今營寨已備固守有餘旣入深賊疆須決萬全之策機須懸料未可輕行此去汴州不越信宿賊之父母妻子盡在其間人之嘗情孰不以家國爲念以我深入之人不以方略制之恐難嘗勝王宜以親軍步卒警其衆按軍以殿臣以其軍擾之使彼不得下營晡晚之後進退無據糧爨不給人心

恐懾因以乘之彼不戰而自潰破賊之道也帝曰河上終日排布恨不見賊今見不殺知復何待德威之言一何怯也顧李存審曰勅輜重先發予爲爾殿後殺之帝御新軍驟出德威命其子曰吾未知其死所矣及軍出未成列梁軍已結陣而來橫亘數十里亦以陣抗之帝與李存審總河東天雄之衆居其中德威以幽薊之師當其西鎮定之師當其東梁將賀環王彥章中軍兩軍旗鼓相當短兵按戰帝御銀鎗軍突入賊中斬擊十餘里賀環王彥章單騎走濮陽時我軍輜重在陣西與梁騎相雜衆見朱旗驚走德威

軍自相蹈藉不能制止故德威一軍敗績陂中有土山迤邐相屬梁餘衆數萬登山帝帥中軍追至山下梁軍戒嚴不動旗幟甚盛帝呼諸軍曰今日之戰得山者勝賊已據山乘高四望平野觀之罔測衆人乍見皆有懼心吾與爾等各馳一騎以奪之帝率騎先登銀鎗步卒繼進策馬大呼一時登山賊紛紜而下帝御衆登山賊在土山西結陣數里時已日暮或曰諸軍未齊不如還營詰朝可戰閻寶進曰深入賊廷逢其大敵期於進銳以決雄雌况賊帥奔亡衆心方恐據山而猶委棄結陣更復何爲今登高擊下勢如

破竹芟除殘孽正在今日銀鎗大將軍建及披甲橫槊而進曰賊軍大將先已奔亡王之騎軍一無所損賊衆晡晚大半思歸擊此疲敗之軍易如拉朽王且登山縱觀責臣以破賊之效於是李嗣昭領騎軍自山之北略賊陣王建及呼士衆曰今日所失輜重竝在山下况彼思歸則一取若拾遺與公等奮前一呼自然披靡建及大呼入賊陣諸軍繼之賊衆大敗時元城令吳瓊貴卿令胡裝各部役徒萬人於山下曳柴揚塵鼓譟助其勢賊不之測自相騰籍棄甲山積俘斬萬計賊衆殆盡

漢高祖以天福十二年四月

漢高祖於晉少帝開運四年二月即位却稱天

福十

二年收復承天軍軍太原東鄆土門路所衝也是歲

二月帝率兵將下井陘以晉太后過嘗山議還乃留步卒一千戍之備其不虞時以虜還守者怠為虜所偵潛來攻我我眾驚潰虜乃焚其井邑一日之中狼煙百餘舉帝曰必虜之將退張虛勢也乃遣親將葉仁魯領步騎三千趣之會虜黨發擄掠取不意軍至為我所敗斬級獲馬各千餘而還一路遂平安

周世宗顯德五年南伐攻楚州率戰士持火炬以焚其城樓克之帝計其敗卒必將南遁因親領衛士及驍騎數百於南城逐之又殺數千人楚州遂平

册府元龜

册府元龜

帝王部

卷之五十五

二十二

冊府元龜 帝王部 卷之二百二十六

冊府元龜

淮南李嗣京參閱

西極文翔鳳訂正

豫章黃國琦較釋

帝王部

一百二十六

納降

王者之師有征無戰三驅之禮來者不射豈不以居
司牧之重法天地之量務揆光大之德以叶亭育之
義哉乃有經綸開創之始繼統守文之代天下未一
四夷未服於是乎蒐軍實厲戎容或建節親征或謀

帥授律先之以文告示之以威武而能究變通之理
識仁義之師率衆以請命束身而效款莫不推在宥
之惠開自新之路榮之以爵秩安之以田宅義征德
勝之道不其盛歟傳曰叛而伐之服而舍之是之謂
矣

漢高祖爲沛公秦二世三年六月引兵圍宛城南陽之縣

南陽守欲自到以刀割頸爲到其舍人陳惔曰死未晚也舍人親近

左右之通稱也後遂以爲私屬官號乃踰城見沛公約降七月南陽守

降 齟降引兵西無不下者至丹水高武侯鯁襄侯王陵

二年十月陳餘怨項羽獨不王已從田榮藉助兵藉借

也以擊常山王張耳耳敗走降漢王

三月漢王自臨晉渡河舊縣名其地居河之西濱東臨晉境本列國時秦所各地

也即今之同魏王豹降至脩武陳平亡楚來降

五年十二月灌嬰追斬項羽楚地悉定獨魯不下漢

王引天下兵欲屠之爲其守節禮義之國乃持羽頭

示其父兄魯乃降

後漢光武初爲更始破虜將軍行大司馬事持節鎮

慰河北卜者王郎詐稱成帝子輿立爲天子都邯鄲

光武自饒陽過滹沱河馳赴信都太守任光開門出

迎光武因發旁縣得四千人先擊堂陽貫縣皆降之

堂陽貫並屬鉅鹿郡堂陽在堂水之陽今冀州縣故城在今冀州鹿城縣西南王莽和戎卒

正邳彤亦舉郡降王莽分鉅鹿為和戎郡卒正職如太守又昌城人劉

植宋子人耿純昌城縣屬信都國故城在今冀州西北宋子縣屬鉅鹿郡故城在今趙州

平棘各率宗親子弟據其縣邑以奉光武於是北降

下曲陽縣各屬鉅鹿郡常山郡衆稍合附者至有數

萬人王郎平更始封光武為蕭王是秋光武擊銅馬

諸賊追至館陶大破之館陶縣屬魏郡今魏州縣受降盡而高湖

重連從東南來與銅馬餘衆合光武復與大戰於滹

陽悉破降之降者猶不自安光武知其意勅令各歸

營勒兵乃自乘輕騎按行部陣降者更相語曰蕭王

推赤心置人腹中安得不投死乎投死猶言致死由是皆服

悉將降人分配諸將衆遂數十萬故關西號光武為

銅馬帝又云岑彭更始時遷潁川太守會春陵劉茂起兵略下潁川彭不得之關乃與麾下數百

人從河內太守邑人韓歆會光武狗河內歆義欲城

守彭止不聽既而光武至懷歆迫急迎降光武知其

謀大怒收歆置鼓下將斬之召見彭彭因進說曰今

赤眉入關更始危殆權臣放縱矯稱詔制道路阻塞

四方蜂起群雄競逐百姓無所歸命竊聞大王平河

北開王業此誠皇天祐漢士人之福也彭幸蒙司徒

公所見全濟未有報德旋被禍難永恨於心今復遭

遇願出身自効光武深接納之彭因言韓歆南陽士

人以為鄧禹軍師

建武元年八月辛亥辛河陽更始廩丘王田立降廩丘

丹州元劉納降

卷之百二十六

縣屬東郡城在今
濮州雷澤縣北
九月辛卯朱鮪舉洛陽城降先是

敗於長安其將朱鮪等堅守洛陽詔廷尉行大將軍
事岑彭與大司馬吳漢大司空王梁建議大將軍朱
祐右將軍萬脩執金吾賈復驍騎將軍劉植揚化將
軍堅鐔積射將軍侯進偏將軍馮異祭遵王霸等圍
之數月鮪等不肯下帝以彭嘗為鮪校尉令往說之
鮪在城上彭在城下相勞苦歡語如平生彭因曰彭
往者得執鞭侍從蒙薦舉拔擢常思有以報恩今赤
眉已得長安更始為三王所反皇帝受命平定燕趙
盡有幽冀之地百姓歸心賢俊雲集親率大兵來攻
洛陽天下之事逝其去矣公雖嬰城固守將何待乎
鮪曰大司徒被害將鮪與其謀又諫更始無遣蕭王
比伐誠自知罪深彭還具言於帝帝曰夫建大事者
不思小怨鮪今若降官爵可保况誅罰言乎河水在
此吾不食言彭復往告鮪鮪從城上下索曰必信可
乘此上彭趣索欲上鮪見其誠即許降後五日鮪將
輕騎詣彭顧勅其部將曰堅守待我我若不還諸君
徑將大兵上轅轅歸報鄧王鄧王更始將尹尊也乃
面縛與彭俱詣河陽帝即解其縛而釋之復令彭夜

及鮪歸城明旦悉其眾出降
拜鮪為平狄將軍封扶溝侯

二年八月帝自將征五校幸內黃縣名屬魏郡大破

五校於蕪陽降之蕪陽城名屬魏郡故城

三年閏正月乙未征西大將軍馮異與赤眉戰於嶠

底大破之嶠山名底假也一名嶽岑餘眾南向宜陽

縣名屬弘農郡韓國都也故城帝自將征之己亥幸

宜陽甲辰親勒六軍大陳戎馬大司馬吳漢精卒當

前中軍次之驍騎武衛分陳左右赤眉望見震怖遣

劉恭乞降曰劉盆子將百萬眾降陛下何以待之帝

曰待女以不死耳樊崇乃將盆子及丞相徐宣以下

肉袒降上所得傳國璽綬更始七尺寶劍及玉璧各一積兵甲宜陽城西與熊耳山齊

昌縣東洛水之北有熊耳山雙巒競舉狀同熊耳帝令縣厨賜食衆積困餒

十餘萬人皆得飽飫明旦大陳兵馬臨洛水令盆子君臣列而觀之謂盆子曰自知當歿不對曰罪當應歿幸上憐赦之耳帝笑曰兒大黠宗室無出者又謂崇等曰得無悔降乎朕今遣卿歸營勒兵鳴鼓相攻決其勝負不欲彊相服也徐宣等叩頭曰臣等出長安東都門君臣計議歸命聖德百姓可與樂成難與圖終故不告衆耳今日得降猶去虎口歸慈母誠歡

誠喜無所恨也帝曰卿所謂鐵中錚錚傭人佼佼者

也錚錚金也鐵之錚錚言微有剛利也佼佼也佼佼也於凡傭之人稍為勝也又曰諸卿大為

無道所過皆夷滅老弱溺社稷汚井竈然猶有三善攻破城邑周徧天下本故妻婦無所改易是一善也立君能因宗室是二善也餘賊立君迫急皆持其首降自以為功諸卿獨完全以付朕是三善也乃令各與妻子居洛陽賜宅人一區田二頃七年冬盧芳所置朔方太守田颺雲中太守喬扈各舉郡降八年閏四月潁川盜賊寇沒屬縣九月帝自征潁川盜賊皆降

十四年九月平城人賈丹殺盧芳將尹由來降

魏太祖漢建安四年十二月廬江太守劉勲率衆來降

五年十月袁紹遣車運穀使淳于瓊等五人將兵萬餘人送之太祖留將曹洪守自將破瓊紹初使其將張郃高覽攻洪聞瓊破遂來降紹衆大潰冀州諸郡多舉城邑降者

晉元帝時杜弢叛亂帝命王敦陶侃等討之弢請降遺應詹書曰天步艱難始自吾州州黨流移在於荆土其所遇值蔑之如遺顛伏死亡者畧復過半備嘗

荼毒足下之所鑒也客主難久嫌隙易構不謂樂鄉起變出於不意時與足下思散疑結求擒其黨雖惟患筭不經遠力不陷堅耳及在湘中懼死求生遂相結聚欲守善自衛天下小定然後輔誠盟府尋山公鎮夏口卽且陳之此公鑒開塞之會察窮通之運納吾於衆疑之中非高識玄覩孰能若此西州人士得沐浴於清流豈惟滌蕩瑕穢乃骨肉之施此公薨逝斯事中廢賢愚痛毒竊心自悼欲遣滕永文張休豫詣太府備列起事以來本末但恐貪功徇名之徒將讒間於聖主之聽戮吾使於市朝以彰叛逆之罪故

未敢遣之而甘陶卒至水陸十萬旌旗曜於山澤舟
艦盈於三江威則威矣然吾衆竊未以爲懼晉文伐
原以全信爲本故能使諸侯歸之陶侃宣赦書而繼
之以進討豈所以崇奉明詔示軌憲於四海逼向義
之夫以爲叛逆之虜跋思善之衆以拯不赦之責非
不戰而屈人之筭也驅略烏合欲與必死者求一戰
未見爭衡之機權也吾之赤心貫於明神西州人士
卿粗悉之耳寧當令抱柱於時不澄於太府邪昔虞
卿不榮大國之相與魏齊同其安危司馬遷明言於
李陵雖刑殘而無慨足下抗歲千里聲播汶衡進宜

爲國思靜難之畧退與舊交措枉直之正不亦綽然
有餘裕乎望卿騰吾箋令時達盟府遣大使光臨使
吾得披露肝膽沒身何恨哉伏想盟府必結紐於綱
紀爲立功於聖世使吾厠列義徒負弩前驅迎皇輿
於閭闔埽長蛇於荒裔雖死之日猶生之年也若欲
先清方夏却定中原吾得一年之糧便泝流西歸夷
李雄之逋寇修禹貢之舊獻展微勞以補往愆復州
邦以謝隣國亦其志也惟所裁處耳吾遠州衰士與
足下出處殊倫誠不足感神交而濟其傾危但顯吾
誠則汶嶽荷忠順之怨衡湘無伐叛之虞隆足下寵

納之望極吾徒滔溺之艱焉可金玉其音哉然顛顛
十餘萬口亦勞瘁於警備思放逸於南敵矣衡嶽江
湘列吾左右若往言有貳血誠不亮益梁受殃不唯
鄙門而已詹甚哀之乃啓呈弢書并上言曰弢益州
秀才素有清望文理旣優幹事兼美往因使流寓居
詹郡界其身心堅白詹所委究李驤爲變樂鄉劫畧
良善弢時出家財招募忠勇登壇歆血義誠慷慨會
驤攻燒南平弢遂東流巴漢與湘中鄉人相遇推其
素望遂相馮結論弢本情非首作亂階者也然破湘
川實弢之罪亦由兵交其間遂使滋蔓按弢今書血

誠亦至矣昔朱鮪自疑於洛陽光武指河水以明心
鮪感義歸誠終展力報施受封侯之寵由恕過以錄
功也詹竊謂今者當厄運之會思弘遠猷故齊赦射
鈎之誅晉貫斬祛之戮用能濟翼戴之高勲隆一成
之美譽况弢等素無斯愆而稽顙投命邳以爲可遣
大使宣揚聖旨雲澤沾之於上百姓沐浴於下則上
下交泰江左無風塵之虞矣帝乃遣前南海太守王
運受弢降

孝武帝太元十年滎陽人鄭燮以郡來降符堅國亂
使使奉表請迎

後魏明元神端元年六月晉冠軍將軍太山太守劉
研弟輔國將軍領東平太守陽平趙鸞廣威將軍平
昌太守羅卓斗城屠各師張文興等率流民七千餘
家內屬

二年二月晉瑯琊太守劉劭率二千餘家內屬

泰常二年姚泓尙書東武姚敞弟鎮遠將軍僧光右
將軍姚定世自洛來奔是年汝南民胡譁等萬餘家
相率內屬

九月晉平西將軍荊州刺史司馬休之息譙王文思
章武王子司馬國璠司馬道賜輔國將軍溫楷竟陵

內史魯軌荊州治中韓延之殷約平西參軍桓燧及
桓溫孫道度子渤海刁雍陳郡袁式等數百人來降
姚泓匈奴鎮將姚成都與弟和都舉鎮來降八年正
月河東薛定薛輔率五千餘家內屬

獻文天安元年九月宋司州刺史嘗珍奇以懸瓠內
屬徐州刺史薛安都以彭城內屬宋將張永沈攸之
擊安都詔北部尙書尉元爲鎮南大將軍都督諸軍
事鎮東將軍城陽公孔伯恭爲副出東道救彭城殿
中尙書鎮西大將軍河西公元石都督荆豫南雍州
諸軍事給事中京兆侯張寤奇爲副出西道救懸瓠

十一月壬子宋兗州刺史畢衆敬遣使內屬

皇興元年宋青州刺史沈文秀冀州刺史崔道固並遣使請舉州內屬詔平東將軍長孫陵平南將軍廣陵公侯窮奇赴援之

二月詔使持節都督諸軍事征南大將軍慕容白曜督騎五萬次於碻礮爲東道後援

孝文太和四年八月以齊角城戍主請舉城內屬詔徐州刺史假梁郡王嘉起赴援之

九月齊汝南太守常元貞龍驤將軍胡青苟率戶內屬

八年冬十月齊雙城戍主王繼宗內屬

十八年帝南伐沈文秀文秀族子陵攜族孫智度歸降引見于行宮

宣武景明二年齊零陵戍主華侯率戶內屬

三年三月南齊建安王寶寅來降

永平四年四月琅琊民王萬壽斬梁輔國將軍琅琊東莞二郡太守劉晰首以响山來降徐州刺史盧昶遣琅琊戍主傅文驥率衆援之

延昌二年二月梁郁州民徐玄明等斬送梁鎮北將軍青冀二州刺史張稷首以州內附詔荊南兗州刺

史樊魯率衆赴之

出帝永熙二年正月梁州刺史曹鳳荊州刺史雷能
勝等舉城內屬

後周武帝天和二年閏六月陳湘州刺史華皎率衆
來附遣襄州總管衛國公直率柱國綏德公陸通大
將軍田弘權景宣元定將兵援之

唐高祖建義隋義寧二年李密之將王君廓以其衆
來降

武德元年六月丙申隋信都郡丞麴稜以冀州來降
南郡丞呂子臧以郡來降

八月隋趙郡通守張志昂以郡來降

十月景午薛仁果所署尚書左僕射鍾俱仇以河州
來降

十一月隋東郡丞王軌以滑州來降

十二月李密舊將敬德逸魯彈塵以新鄭來降梁師
都所署定南王賀遂新平以其地來降

二年正月景寅李密所署伊州刺史張善相遣使來
降是月我行人魏徵說李密所署魏州總管元寶藏
執宇文化及將軍於士澄以魏州來降

二月王世充慈澗鎮將裴師亮率其屬來降壬辰王

世充將賈六郎率衆數千人來降癸巳隋樂安郡丞張志靖以郡來降是月李密許州刺史崔樞並遣使來降衛州人趙叔機執王世充所署刺史廉循道以州來降

閏三月河內人李厚德殺其殷州長史趙景休以獲嘉來降是月王世充慈澗人執其守將賈仁果以城來降隋漁陽太守田善集以郡來降甲寅隋夷降郡丞許紹率黔安武陵灃陽等諸郡酋帥並遣使來降是月宇文化及僞置蜀王宇文士及并其內史令封德彝自濟南來降又可達寒賊朱粲遣使請降帝遣

前御史大夫段確使於朱粲

三月甲戌王公正以安昌丁伯德以濟源苟王世充來降庚辰隋北海通守鄭處符文登縣令惠整東海賊帥蔣弘度濟郡賊帥王簿鄆州賊帥霍小漢張青將任州賊帥徐師順平陸賊帥張當金壽張賊帥閻漢涉須昌賊帥孫善遇並以其地來降丁亥隋渤海郡丞王孝師以衆來降王世充疆山鎮將羅注率男女六千人以鎮來降丁酉齊州渠帥李義滿率衆三千以章丘來降又淮南一十五州遣使來降

四月己亥王世充將宋君德殺其鎮北將軍王文廓

率衆數千以碭石鎮來降甲辰王世充將衛須拔率衆以陝州來降丁未王世充將段德瑗率衆八百來降

七月蕭銑辰州刺史田猷以州來降

八月王世充趙士達率其部及圃田縣並來降

九月王世充將傅才率所部來降

十月王世充將路則率所部來降

三年正月黎州總管李世勣於寶建德中自拔來歸世勣本姓徐李密據洛口以爲東海公宇文化及之弑逆也引師北上密遣世勣守黎陽倉化及攻之不

尅數月而去密解兵還金墉尋爲世充所敗世勣以黎陽之衆北連洛相東極海隅南達淮海盡李密之境並相率來降遇寶建德陷我山東之地進軍攻世勣戰不利力屈降之建德收其父蓋從軍爲質乃令世勣復守黎陽世勣與其官屬郭恪柳得文等謀曰地陷父質身爲賊首欲立功歸國而力不遂如何郭恪曰今新被賊使動即見疑宜擊世充自展誠効情相體信然後可得行其志耳世勣然之乃襲破獲嘉虜世充之衆以獻於建德由是親之因又遣人說建德曰曹戴兩州戶口全實賊帥孟海公據有其地聲

屬僞鄭內實攜離進兵吞之立便可得既併海公以臨徐兗可不戰而定河南矣建德然之自南略前進其大將曹旦齊善行等領兵渡河世勣以衆會之謀至河南而翻破建德冀得其父總取賊地立功以歸朝遇建德妻產久而不至且在河南多所侵擾李商胡等諸部怨之商胡與世勣素結爲兄弟升堂拜親商胡之母泣謂世勣曰竇家無道如何事之世勣曰願母勿憂待一月內謹當殺取總歸唐國耳世勣辭去母謂其子曰東海公許我共圖此賊事須早斷何用待來事久變生不如卽決於是起兵襲破建德水

軍方遣人往報世勣世勣與曹旦並營郭恪勸襲旦世勣未能決而且已知之營中嚴警不可犯於是與恪等馳數十騎來奔高祖大喜遣使者迎勞之
二月辛亥王世充伊闕縣副王三都殺其鎮將以衆來降

三月己卯王世充將趙知遠許恪奴率其所部來降
牂州庸州黔州兗州並遣使來降
四月丙辰陝州總管于均自宋金剛所來降
五月癸未長子縣丞長卿斬劉武周安州刺史宋德壽來降

八月庚子鄧州豪執王世充所署刺史子剛來降癸卯梁師都石堡留守張舉率其男女千餘口來降九月庚午梁師都督劉晏來降癸酉王世充顯州總管田瓚以其部二十五州來降丁丑王世充蔚州刺史時德叔以其地來降壬午王世充濮州刺史杜才幹斬其滑州行臺僕射景元貞以濮陽來降十月甲午王世充將張鎮州來降戊戌世充將王舉以迴洛東城來降庚戌世充管州總管楊慶以州來降景辰王世充榮州刺史魏陸執世充大將軍張志等四將以來降

十二月辛卯河南許亮等十有一州皆王世充來降辛丑王世充隨州總管徐毅以其地來降

四年正月丁卯竇建德行臺尚書令胡大恩以大安鐘來降辛巳王世充梁州總管程嘉會以其地來降二月庚戌王世充兄子大棄河陽而遁其所部將以其城來降乙卯王世充懷州刺史陸善宗以城來降是月王世充將劉元氣以青城宮來降

四月戊午王世充出兵攻竇軌軌師不利賊入其營太宗率精騎突之所向皆靡獲其大將葛彥璋賊敗績斬首二千餘級降其甲卒萬餘人丙午王世充平

王德仁棄故洛陽城而遁其亞將趙季嘽以城來降

戊辰世充率其將吏降洛陽平

庚午周法朗以蘄春等四郡來降壬申洛相魏等州

來降

戊寅王世辨以徐宋等三十八州降世死故地悉定

寶建德博州刺史王羨來降

壬午寶建德尚書右僕射裴知兵部尚書曹旦等以

傳國等八璽來降

六月戊戌蔣善人以鄆州孟噉鬼以曹州來降

七月庚申王世充兄子偽魏王弘烈宋玉大行臺右

僕射豆盧行褒左僕射蘇世長以襄州來降以其地

置襄州道又云麗王京兆涇陽人隋監閣李密之據

洛也至統關中精銳以擊之隸於王世充

與賊連戰者百餘陣及密敗歸于東都太宗之徇洛

陽王率精兵萬餘來降又云田瓚淮安人初為賊帥

楊士林長史後為士林所忌懼不自安遂殺士林而

叛歸王世充偽署顯州總管尋以地來降復其本土

十月辛卯蕭銑鄂州刺史雷長穎以魯山來降丁酉

蕭銑江州總管蓋彥舉以州來降戊申徐圓朗昌州

治中劉善行斬總管夏寶以須昌來降

十月己亥隋始安太守李襲志以桂州來降

五年正月丙戌同安賊帥殷恭遠以舒州來降己酉嶺南俚首楊世略以循潮二州來降

二月戊辰金鄉人楊孝誠率衆三千背徐圓劄以城來降

四月戊寅廣州賊帥鄧文進隨合浦太守寧宣平南太守李駿等並遣使來降

五月庚寅瓜州豪右王幹斬賀拔行威來降瓜州方始得平

六年正月己卯饒陽人葛德威執劉黑闥以城降山東悉平

五月癸巳馬邑賊高滿政所部將張天明請降遣右武衛大將軍李遷以兵援之己亥梁師都將高成郎

以所部來降戊午滿政斬突厥二百人以馬邑來降

滿政馬邑人也劉武周僭號以滿政爲將及武周之敗范君章復據馬邑滿政懷歸國之計遂舉兵以襲君章覺變方奔突厥滿政斬君章之子以城來降

七月辛巳沙州高閼道所部弘陽統漢二鎮相率來降

九月乙未西沙州賊帥竇伏明斬賀拔威以城來降

十月己未逆賊張大智侵洛州刺史田世康益州行臺尚書郎行方開州刺史冉仁德討之大智以衆來

降

太宗貞觀十九年六月征遼是月丁酉攻白巖城李
勤攻其西南帝臨其西北城主孫伐音潛令腹心人
請降乃臨牒投亦戲以爲信曰奴願降其中有王者
言曰以我旗幟示必降逮之城主伐音所遣人得而
樹之於城高麗以爲唐兵登也衆悉從之初遼東之
陷也城中懼而請降既而中悔帝怒其反覆許以城
中人物分賜將士至是李勤見且受降率甲卒數十
人請於帝曰戰士奮厲爭先不顧矢石者貪獲虜耳
今城垂拔奈何更許其降無乃孤將士之心成黷虜

之計帝下馬而謝曰將軍言是也然縱兵殺戮虜其
妻孥朕所不忍將軍麾下有功者朕以庫物賞之庶
因將軍贖此一城勤乃止遂受降獲士女一萬勝兵
一千四百倉廩二萬八千石帝御旌宮於水渚高麗
降衆重列而拜者二千餘人優勞之高麗舞蹈叫呼
聲震山谷命太官賜食解牲體而羅之不置亦高麗
手擘口齧骨肉俱盡城中人年八十以上賜帛各有
差及諸城堡人帝悉加慰諭給以糧仗任其所往城
中父老僧尼貢夷酪昆布米餅蕪葦鼓箏帝悉爲少
受而賜之以帛高麗喜甚皆仰天下拜曰聖天子之

恩非所望也丙辰次於安市城北丁巳高麗高惠真率衆十五萬來援於安市城東南八里而陣帝令李勣率步卒擊之高延壽衆退長孫無忌縱兵乘其後太宗又引軍臨之賊大潰斬首二萬餘級己未高延壽高惠真率三萬六千餘人請降帝引入轅門延壽膝行而前拜手請命帝謂延壽等曰東夷英少壽張海曲至於摧堅破敵故當不及老人而今而後更敢與天子戰否延壽等咸伏地而不對辭簡褥陸已下及酋首三千五百人授以戎秩遷之內地餘人並釋俘放還平壤其謝恩於天子並雙舉手以額頓地惟叫之聲聞數十里外收靺鞨三千三百人盡坑殺之獲馬五萬匹牛五萬頭光明甲一萬領他戰器械稱是唐肅宗至德二年十二月安祿山僞御史大夫嚴莊來降元帥廣平王領送西京賊所侵河東河西諸郡皆歸順賊將盡投河北唯能元皓在北海高秀巖在大同並相次送款

乾元元年二月丁卯逆賊孫孝節來降詔百官於朝觀之

代宗永泰元年僕固懷恩大將僕固名臣以千餘騎來降

大曆十年五月乙未魏州田承嗣部將霍榮國以磁州歸順是年十一月田承嗣所營瀛州刺史希光

其以城降有兵萬餘人積穀二十萬斛

後唐莊宗初為晉王討幽州劉守光天祐十年二月

史失

東北面行營周德威上言蘇州降將成行言陳萬達

羅景溫來降

三月乙丑幽州劉守光將張方信賈全節挈族二百五十口來降

四月甲申劉守光將校李暉王行安王元迪王行周李在殷王文豐延陵位劉行遇楊令暉劉行宇王元

福尹謙李暉段文祐李行禮馬令紹賈從暉韓令珪

等並攜家屬來降周德威引軍逼幽州南門賊將鄭

宗遇王居侓趙行立鄭賽管丙來降

七月壬子劉守光將楊師貴等五十人來降

八月賊將李進劉建章劉唐珪張在禮劉敬德等來

降

九月燕將史德讓衛章李彥暉董行立等來降

十月燕將王居爽軍使孟在章一百六十人來降

十五年八月己酉梁兗州節度使張萬進遣使歸款

同光元年八月帝自鄴御軍至朝城與梁軍相遇戊

戊梁將左右先鋒指揮康延孝領騎百人來投

延孝本晉

陽人家世部族少隸太祖軍負罪奔於梁漸至徧袒性剛烈負氣不居人下知梁朝終敗來奔帝虛懷引見賜御錦袍玉帶屏人問之對曰臣竊觀汴人兵衆不少論其君臣將較終見敗亡趙巖趙鵠張漢傑居中專政締結宮掖賄賂公行每命一統軍必先入金銀千錠不由勲德以賂取人段凝智勇俱無一朝便爲大將是由入銀爲賂便付兵權霍彥威王彥章皆宿將各臣却出其下切齒側目勢不奈何自將兵已來率斂行伍曲心事賂阿媚取容自彥章獲德勝齒城梁主亦稍獎使此人立性剛暴不奈凌制梁主每章一發軍即令近臣監當進止可否悉取監臨處分彥章懼悒形於顏色自通津失利段凝彥章又獻謀策欲數道舉軍令董璋以陝號澤潞之衆趨石會閔以寇太原霍彥威統關西汝洛之衆自衛相邢洛以寇鎮定段凝杜晏球領大軍以攻鄆州決取十月大舉又自滑州南決破河堤使水東注曹濮之間至於汝陽彌漫不絕以限北軍臣在南中側聞此議臣亦料其兵力聚則不少分則無餘陛下但待彼分却諸軍

領鐵騎五千自鄆州移程直抵宋汴不旬日天下事定斷曰不疑且密喻藩鎮各令戒嚴餘無憂矣帝憚然壯其陳述然聞汴軍大舉心亦憂之延孝之來其母妻子在滑密約同奔及延孝至亦自滑浮舟東下至於鄆城

晉高祖天福元年閏十一月己卯車駕至河陽北節度使萇從簡來降

三年八月魏府軍前澶州刺史馮暉自遞城來降

九月己酉宮苑使焦繼勳自軍前押魏博節度使范

延光牙將馬諤齋歸命待罪表到闕壬子延光領部

下兵士素服於本府門俟命有詔釋罪

六年九月十一日以襄州投降賊軍馬軍七百餘人

名彰順步軍一千一百餘人名歸順並令汝州收管
開運元年十二月青州楊光遠降光遠子承勳等斬
觀察判官丘濤牙將白延祚楊贍杜延壽等首級送
於招討使李守貞乃縱火大譟劫其父於私第以城
納款遣郎墨縣令王德柔貢表待罪楊光遠亦遣節
度判官楊麟奉表請死詔釋之

漢高祖卽位稱天福十二年五月車駕離晉陽澤州
刺史翟令奇以郡來降至絳州本州刺史李從勳以
郡降初契丹遣偏校成霸卿曹可璿等守其郡帝建
義之始不時歸命及車駕至帝耀兵於城下不令攻
擊從勳等遂降

周太祖初爲漢樞密使以乾佑二年奉命討李守貞
五月九日賊河西水砦主周光遜以砦及將校兵士
一千一百三十二來降賊南面都監王仁岳之下十
六人指揮使石公進草賊都頭惡長官聶知遇王三
鐵之下十六人副兵馬使軍頭十將長行共一千四
十七人賊火城內乘船投來都頭劉瓊安建武之下
三十七人並來奔十日太祖率騎部領降將周光遜
等兵士三千人入長連城以徇尋有賊職員八人來
奔其夜又賊將胡進超已下三百餘人歸

世宗顯德元年三月親征河東四月乙卯河中節度使王彥超上言偽汾州防禦使董希顏以城歸順丙辰偽遼州刺史張漢超以城歸順先帝遣萊州防禦使康延紹率師討遼州又遣密州防禦使田瓊率師攻沁州先以宣旨招諭如不受命即進軍伐之二州皆拒命延紹及瓊請益兵及治攻具以迫之帝可其奏各益之以步卒三千仍詔主將期以三日克之是日田瓊遣潞州行軍司馬安友規上言沁之禦備甚堅賊皆死戰攻取未下帝暴怒疑其逗撓亟命延駕欲親至其所群臣以偏郡孤危請車駕不行會中使

自遼州至言賊城已歸順乃止五月丙子偽代州防禦使鄭處謙上表歸順時契丹大將楊衮自高平之敗奔至代州及聞王師至太原意處謙等有變謀奪其州一日立召處謙計事處謙懼不敢赴衮使虜騎數十守其城門處謙與軍民共擊殺之因閉壁以拒蕃戎遣使歸命且乞援兵時劉崇所署偽樞密直學士王得中自虜中使廻至代州遇變亦上表歸命

二年王師伐蜀九月癸丑西南面都監向訓上言秦州以城降初鳳州重圍既合日已危蹙蜀人乃遣偽秦州節度使高處儔領兵自秦州出將解鳳州之圍處儔聞堂舍之敗且懼追兵將至因潰歸秦州偽觀察判官趙玘閉城拒之處儔遂西遁玘澶

州人也初補集賢院書吏後調選出官因從知於階
成間開運末戎虜盜國節度使何建以城入蜀後受
偽命為秦州觀察判官及聞處儔敗走盡召秦州官
屬諭之曰今大朝兵甲無敵於天下自用師西征戰
無不勝蜀中所遣將校皆武勇者所發兵士皆驍銳
者然殺戮逃遁之外幾無孑遺我輩安坐受其禍去
危就安當在今日聞者皆
俯伏聽命玆遂以城降

四年再征淮西三月辛卯夜偽監軍使朱元賊將朱
仁裕孫璘等相次各舉其砦來降其卒萬餘眾帝慮
其餘黨沿流東潰遽令步將趙晁率舟師數千沿淮
而下逐之

十二月帝幸淮上乙卯泗州守將范再遇以其城降
獲降卒三千餘人庚申招討使李重進上言偽濠州
團練使郭延謂已下以其城降濠州平降其卒萬餘
眾獲軍糧數萬石乙丑漣水縣偽雄武軍使知縣事
崔萬迪以其縣來降

六年幸滄州四月辛丑次益津關偽守將終廷輝以
其城來降
癸卯至瓦橋關偽守將姚內斌率其部眾五百餘人
以城來降八于瓦橋關駐蹕於行宮甲辰偽鄭州刺
史劉信上表歸順

冊府元龜

淮南李嗣京參閱

西極文翔鳳訂正

豫章黃國琦較釋

帝王部

一百二十七

明賞

夫賞國之典也所以褒有功勸能者為國之大柄藏
在盟府而不可廢焉歷代而下致治之后曷嘗不旌
勞顯庸錄勤聳善報之以封爵寵之以名秩賚之以
金帛賜之以車服頒之於公朝而不僭載之於史策

而弗忘是故懋功之義明而邦典有敘為善之效速而人倫知勸蓋周官之以庸制祿先王之加膳飲賜率是道也其百世所不易者哉

周惠王二年五大夫奉子頹以伐王王奔温冬立子頹明年鄭伯殺子頹王與之武公之畧自虎牢以東

略界也鄭武公傳平王賜之自虎牢以東後失其地故惠王令復與之虎牢河南城息縣

漢高祖四年令侯公說項羽羽與漢約中分天下歸太公呂后軍皆稱萬歲乃封侯公為平國君

五年項羽兵敗自剄王翳取其頭亂相蹂躪爭羽相殺者數十人最後楊喜呂馬童郎中呂勝楊武各得

其一體故分其地以封五人皆為列侯

是年漢王即皇帝位論功行封群臣爭功歲餘不決

帝以蕭何功最盛先封為鄼侯食邑八千戶羣臣皆

曰臣等身被堅執銳多者百餘戰少者數十合攻城

略地大小各有差今蕭何未有汗馬之勞徒持文墨

議論不戰顧居臣等上何也顧猶反也帝曰諸君知獵乎

曰知之知獵狗乎曰知之帝曰夫獵追殺獸者狗也

而發縱指示獸處者人也發縱謂解絀而放之也指示者以手指示之今俗言

放狗縱音子用反而讀者乃為蹤蹟之蹤非也今諸書本皆不為蹤字自有逐蹤之狗不待人發也今諸

君徒能走得獸耳功狗也至如蕭何發縱指示功人

也且諸君獨以身從我多者三兩人蕭何舉宗數十人皆隨我功不可忘也羣臣皆莫敢言列侯畢已受封奏位次皆曰平陽侯曹參身被七十創攻城略地功最多宜第一帝已撓功臣言多封何至位次未有以復難之然心欲何第一關內侯鄂千秋時為謁者進曰群臣議皆誤夫曹參雖有野戰略地之功此特一時之事夫帝與楚相距五歲失軍亡衆跳身遁者數矣跳身謂輕身走出也然蕭何常從關中遣軍補其處非帝所詔令召而數萬衆會帝乏絕者數矣夫漢與楚相守滎陽數年軍無見糧蕭何轉漕關中給食不乏陛下雖數亡山東蕭何嘗全關中待陛下此萬世功也今雖無曹參等百數何缺於漢數音所具反漢得之不必待以全奈何欲以一旦之功加萬世之功哉蕭何當第一曹參次之帝曰善於是乃令何賜帶劍履上殿入朝不趨帝曰吾聞進賢受上賞蕭何功雖高待鄂君迺得明於是因鄂千秋故所食關內侯邑二千戶封為安平侯是日悉封何父母兄弟十餘人皆食邑公孫戎高祖東園項羽聞樊噲反旄頭公孫戎明之卒不反封戎二千戶

孝文元年十月詔曰前呂產自置為相國呂祿為上

將軍擅遣將軍灌嬰將兵擊齊欲代劉氏嬰留滎陽
 與諸侯合謀以誅呂氏呂產欲為不善丞相平與太
 尉勃等謀奪產等軍朱虛侯章首先捕斬產太尉勃
 身率襄平侯通通紀通也持節承認入北軍典客揭揭劉揭也
 奪呂祿印其益封太尉勃邑萬戶賜金五千斤丞相
 平將軍嬰邑各三千戶金二千斤朱虛侯章襄平侯
 通邑各二千戶金千斤封典客揭為楊信侯賜金千
 斤六月脩代來功自代時來有功者詔曰方大臣誅諸呂迺
 朕朕狐疑皆止朕狐之為獸其性多疑每渡水河唯且聽且渡故言疑者而稱狐疑
 中尉宋昌勸朕朕已得保宗廟以尊昌為衛將軍其

封昌為壯武侯諸從朕六人皆至九卿又曰列侯從

高祖入蜀者六十八人益邑各三百戶吏二千石以

上從高祖潁川守尊等十人食邑六百戶淮陽守申

屠嘉等十人五百戶衛尉定等十人四百戶申屠嘉從高祖

擊項籍遷為隊率從擊黥布為都尉孝惠時為淮陽守至是舉故以二千石從高祖者悉以為關內侯食

邑二十四人而武帝元朔元年車騎將軍衛青出雲中取河南地為

朔方郡以三千八百戶封青為長平侯校尉蘇建為

平陵侯張次公為岸頭侯帝曰匈奴逆天理亂人倫

暴長虐老以盜竊為務行詐諸蠻夷造謀籍兵數為

冊府元龜 帝王部 卷之二十七 四

邊害從蠻夷借故興師遣將以征厥罪詩不云乎薄

伐獫狁至于太原出車彭彭城彼朔方今車騎將軍

青度西河至高關獲首二千三百級車輜畜產畢收

為鹵已封為列侯遂西定河南地案榆谿舊塞上郡之比

有諸次山諸次水出焉東經榆林塞為榆谿言軍尋此塞而行也絕梓嶺梁北河討

蒲泥破符離絕度也為北河作橋梁也蒲泥符離二王號也符離塞名斬輕銳之

卒捕伏聽者伏於隱者聽軍虛實三千一十七級執訊獲醜敵

馬牛羊百有餘萬全甲兵而還益封青三千八百戶

五年春車騎將軍衛青將三萬騎出高關衛尉蘇建

為游擊將軍左內史李沮為彊弩將軍沮音太僕公

孫賀為車騎將軍代相李蔡為輕車將軍皆領屬車

騎將軍俱出朔方大行李息岸頭侯張次公為將軍

俱出右北平匈奴右賢王當青等兵以為漢兵不能

至此飲醉漢兵夜至圍右賢王右賢王驚夜逃獨與

其愛妾一人騎數百馳潰圍北去漢輕騎校尉郭成

等追數百里弗得得右賢裨王十餘人裨王小王也若言裨將也

裨音類衆男女萬五千人畜數十百萬數十萬以於

是引兵而還至塞天子使使者持大將軍印即軍中

拜青為大將軍即就也諸將皆以兵屬立號而歸帝曰

大將軍躬率戎士師大捷獲匈奴王十有餘人益封

青八千七百戶而封青子伉為宜春侯

伉音抗又子音工師反

不疑為陰安侯子登為發干侯青固謝曰

固謂再三也

幸得待罪行間賴陛下神靈軍大捷皆諸校力戰之

功也陛下幸已益封臣青臣子在襁褓中未有勤勞

上幸裂地封為三侯非臣待罪行間所以勸士力戰

之意也伉等三人何敢受封帝曰我非忘諸較功也

今固且圖之乃詔御史曰護軍都尉公孫敖三從大

將軍擊匈奴常護軍傳較獲王

傳讀曰附言敖總護諸軍每附部校以至

克捷而獲王也校者營壘之稱故謂軍之一部為一校或曰幡旗之名非也每軍一校或別為幡耳不名

校封敖為合騎侯

猶冠軍從票之名也

都尉韓說從大軍出竇

渾

塞名也竇音田渾音魂至匈奴右賢王庭為戲下

戲讀曰靡又音許宜

反言在大將軍渾旗之下也

搏戰獲王封說為龍額侯

額字或騎作額

將軍賀從大將軍獲王封賀為南窳侯

茂陵中書云南窳侯此本

字也窳音普教反窳亦同字

輕車將軍李蔡再從大將軍獲王封

蔡為樂安侯校尉李朔趙不虞公孫戎奴各三從大

將獲王封朔為陟軹侯不虞為隨成侯戎奴為從平

侯將軍李沮李息及較尉豆如意中郎將縮皆有功

賜爵關內侯沮息如意食邑各三百戶校尉張騫以

知水草處得不乏封博望侯

元狩三年霍去病為驃騎將軍將萬騎出隴西有功

帝曰驃騎將軍率戎士踰烏鎰諭與踰同鎰古戾字也烏鎰山名也討

遼濮遼古速字也遼濮濮何奴部落名也涉狐奴水名也歷五王國輜重

人衆懾讐者弗取懾讐謂振動失志氣言距戰者誅服者則赦也讐音之涉反幾

獲單于子幾音巨求反轉戰六日過焉支山千有餘里合

短兵鏖臯蘭下鏖字本從金塵聲轉寫訛耳鏖謂若臯蘭山下而多殺虜也臯音意曹反今俗猶謂打擊之甚者曰鏖殺折蘭王斬盧侯

王折蘭匈奴中姓也今鮮卑有是蘭姓者即其種也折音上刑反說捍者誅全甲獲

醜執渾邪王子及相國都尉捷首虜八千九百六十

級收休屠祭天金人今之佛像是也休音許虬反屠音儲師率減什七

漢兵失亡之數益封去病二千二百戶其夏去病出

下皆顯此也

此地遂深入合騎侯失道不相得去病至祁連山祁連山即天山也匈奴呼天為祁連祁音上夷反捕首虜甚多帝曰票騎將軍

涉鈞耆濟居延鈞耆居延皆水名也淺曰涉深曰濟涉謂人馬涉渡也濟謂以舟船也

遂臻小月氏攻祁連山揚武平鱒得鱒得匈奴中地名張掖縣轉取

其名得單于單栢酋涂王單栢酋涂皆胡王也及相

國都尉以衆降下者二千五百人可謂能舍服知成

而止矣捷首虜三萬二百獲五王王母單于闕氏王

子五十九人相國將軍當戶都尉六十三人師大率

減什三益封去病五千四百戶賜較尉從討小月氏

者爵左庶長鷹擊司馬破奴趙破奴再從票騎將軍斬

者爵左庶長鷹擊司馬破奴趙破奴再從票騎將軍斬

再從票騎將軍斬

邀濮王捕稽且王

且音子 間反

右千騎將王王母各一人

王子以下四十一人捕虜三千三百三十人前行捕

虜千四百人

前行謂在軍 之前而行

封破奴為從票侯

從票騎 將軍有

功因以 為號

校尉高不識從票騎將軍捕呼于者王王子

以下十一人捕虜千七百六十八人封不識為宜寇

侯較尉僕多有功封為輝渠侯其秋渾邪降去病將

兵往迎之於是帝嘉去病之功曰票騎將軍去病率

師征匈奴西域王渾邪王及厥眾萌咸犇於率

萌字 與吐

同犇古 奔字也

以軍糧接食并將控弦萬有餘人

言能引弓 皆堪戰陳

誅獍捍

獍徒行輕貌也字或作超悍勇 也獍音丘照反又音丘召反

捷首虜八千

餘級降異國之王三十二戰士不離傷

離遭 也

十萬之

眾畢懷集服仍興之勞爰及河塞庶幾忘患

重與軍 旅之勞

及此河沙塞之表可 得寧息無憂患也

以千七百戶益封票騎將軍減

隴西地上郡戍卒之半以寬天下繇役廼分處降者

於邊五郡故塞外而皆在河南因其故俗為屬國

四年霍去病出征匈奴騎兵車重與大將軍軍等

重 也

而亡裨將悉以李敢等為大校當裨將出代右北

平二千餘里直左方兵

直當 也

所斬捕功以多於青旣

皆還帝曰票騎將軍去病率師躬將所獲輦狁之士

堯曰獍鬻周曰獍狁秦 曰匈奴鞞字與熏同

約輕齎絕大幕涉獲單于章

渠章渠單于之近臣也涉水而破獲之以誅北車者王號也轉擊左大將

雙獲旗鼓歷度難侯山名也濟弓盧水名也獲屯頭王韓

王等三人皆匈奴王號將軍相國當戶都尉八十三人封

狼居胥山禪於姑衍登臨瀚海積土增山曰封為壇祭地曰禪執訊

獲醜七萬有四百四十三級師率減什二取食於敵

卓行殊遠而糧不絕以五千八百戶益封票騎將軍

右北平太守路博德屬票騎將軍會與城不失期從

至禱余山禱音籌其字從木斬首捕虜二千八百級封博德

為鄧離侯北地都尉衛山從票騎將軍獲王封山為

義陽侯故歸義侯因淳王復陸支樓剌王伊即音剌軒

之交反軒音居言反皆從票騎將軍有功封陸支為壯侯伊即

軒為衆利侯從票侯破奴昌武侯安稽從票騎有功

益封各三百戶漁陽太守解較尉敢皆獲鼓旗賜爵

關內侯解食邑三百戶敢二百戶校尉自為爵左庶

長軍吏卒為官賞賜甚多而青不得益封吏卒無封

者唯西河太守嘗惠雲中太守遂成受賞遂成秩諸

侯相賜食邑二百戶黃金百斤惠爵關內侯

元封元年東粵王餘善反遣橫海將軍韓說出句章

樓船將軍楊僕出武林討東粵發兵距險使徇北將

軍守武林敗樓船軍數校尉殺長史樓船軍卒錢塘

椽終古斬狗北將軍等會稽縣也椽姓終古名也椽音袁封為語兒

侯越中地也今吳南亭是語字或作禦其音同也自兵未往故粵衍侯吳陽

前在漢漢使歸諭餘善不聽及橫海軍至陽以其邑

七百人反攻粵軍於漢陽及故粵建成侯敖與繇王

居股謀俱殺餘善以其眾降橫海軍封居股為東成

侯萬戶封敖為開陵侯封陽為卯石侯橫海將軍說

為按道侯橫海較尉福為繚嫫侯繚音遼嫫音於耕反福者城

陽王子故為海嘗侯坐法從軍爵亡故以宗室故侯

及東粵將多軍多軍名漢兵至棄軍降封為無錫侯故

甌落將左黃同斬西于王封為下邳侯邳音

二年左將軍荀彘等擊朝鮮王右渠朝鮮相陶啜路

人皆亡降漢路人道歿三年夏尼谿相參廼使人殺

朝鮮王右渠來降王守險城未下故右渠之大臣成

已又反覆改變左將軍使右渠子長古渠之子名長降相路

人子最相路人前已降漢而歿於道故謂之降相最者其子名告諭其民誅成

已故遂定朝鮮為貞番臨屯樂浪玄菟四郡封參為

濼清侯濼音獲陶為秋苴侯功臣表秋苴屬渤海苴音千餘反啜為平

州侯長為幾侯最以父歿頗有功為涅陽侯

太初四年貳師將軍李廣利斬大宛王首獲汗血馬

來乃下詔曰匈奴為害久矣今雖徙幕北與旁國謀

共絕大月氏使遮殺中郎將江故鴈門守攘危須以
 西及大宛皆合約殺期門車令危須國名也漢使期門郎也車令姓名也
 中郎將朝及身毒國使隔東西道貳師將軍廣利征
 討厥罪伐勝大宛賴天之霧從沂河北涉流沙通西
 海山雪不積士大夫徑度獲王首虜珍怪之物畢陳
 於闕其封廣利為海西侯食邑八千戶又封斬郁成
 王者趙弟為新時侯軍正趙始成功最多為光祿大
 夫上官桀敢深入為少府李哆有計謀為上黨太守
 野反哆音昌軍官吏為九卿者三人諸侯相郡守二千石
 百餘人千石以下千餘人奮行者官過其望以適過

行者皆黜其勞

適讀曰謫

士卒賜直四萬錢

或以他財物充之故云直

征和二年戾太子反軍敗武帝曰侍郎莽通獲反將
 如侯長安男子景建從獲少傅石德可謂元功矣大
 鴻臚商丘成力戰獲反將張光其封通為重今侯建
 為德侯成為秬侯秬音姪在濟陰城武今有亭戾太子兵敗亡至
 湖湖縣名今號州閩鄉湖城二縣皆其地也臧匿泉鳩里泉鳩水今在閩鄉縣東南十五里見有戾太子冢在澗東也主人家貧常賣履以給太子太子有
 故人在湖聞其富贍使人呼之贍足也而發覺吏圍捕
 太子太子自度不得脫度音大各反即入室距戶自經山
 陽男子張富昌為卒足踰開戶新安令史李壽趨抱

解太子主人公遂格闔成皇孫二人皆并遇害上既傷太子乃下詔曰蓋行疑賞所以申信也其封李壽為邗侯

邗在河內為其解救太子也邗音于

張富昌為題侯

三年城父令公孫勇與客胡倩等謀反倩詐稱光祿大夫從軍騎數十言使督盜賊止陳留傳舍太守謁見欲收取之淮陽大守田廣明覺知發兵皆捕斬焉而公孫勇衣繡衣乘駟馬車至圍圍使小吏侍之亦知其非是守尉魏不害與廐嗇夫江德尉史蘇昌共收捕之帝封不害為當塗侯德轅陽侯昌蒲侯初四人俱拜於前小史竊言武帝問言何對曰為侯者得

東歸不帝曰汝欲不貴矣

言汝意欲歸不吾令貴汝謂賜之爵也

女鄉

名為何對曰名遺鄉帝曰用遺汝也

遺弋

於是賜小

史爵關內侯食遺鄉六百戶

後元元年侍中僕射莽何羅與弟重合侯通謀為逆

莽音莫戶反

霍光與金日磾上官桀等共誅之功未錄武

帝遺詔封金日磾為秬侯上官桀為安陽侯光為博

陸侯

博大陸平取其嘉名無此縣也食邑北海河東城

皆以前捕反者功封

昭帝始元六年使匈奴移中廐監

移中廐名

蘇武至京師

詔武奉一太牢謁武帝園廟拜為典屬國秩中二千石賜錢二百萬公田二頃宅一區常惠徐聖趙中根

皆拜為中郎賜帛各二百匹其餘六人老歸家賜錢

人十萬復終身

復音方目反

武自孝武時使匈奴留單于

庭十九年帝即位匈奴與漢和親遣使求武等單于

召會武官屬

會謂集聚也

前以降及物故凡隨武還者九

人

物故謂成也言其同於鬼物而故也一說不欲斥言但云其所服用之物皆已故耳而說者妄欲改

物為勿非也故有是命

元鳳元年十月誅上官桀等詔曰左將軍安陽侯桀

票騎將軍桑落侯安御史大夫桑弘羊皆數以邪枉

干輔政大將軍不聽而懷怨望與燕王通謀置驛往

來相約結燕王遣壽西長孫縱之等賂遺長公主丁

外人謁者杜延年大將軍長史公孫遺等交通私書

共謀令長公主置酒伏兵殺大將軍光徵立燕王為

天子大逆母道故稻田使者燕倉先發覺以告大司

農敞敞告諫大夫延年延年以聞丞相徵事任宮手

捕斬桀丞相少史王壽誘將安入府門皆已伏誅吏

民得以安封延年倉宮壽皆為列侯

三年匈奴遣右賢王犁汗王入寇張掖都尉大擊破

之屬國千長義渠王騎士射殺犁汗王

千長者千人之長賜

黃金二百斤馬二百匹因封為犁汗王屬國都尉郭

忠封成安侯

四年詔曰度遼將軍范明友前以羗騎校尉將羗王侯君長以下擊益州反虜後復率擊武都反氏今破烏桓斬虜獲生有功其封明友為平陵侯

平樂廐監傅介子使西域刺殺樓蘭王持首還詣闕公卿將軍議者咸嘉其功帝廼下詔曰樓蘭王安歸嘗為匈奴間候遮漢使者言為匈奴之間使而候伺發兵殺略衛

司馬安樂光祿大夫忠期門郎遂成等三輩及安息大宛使盜取節印獻物此安息大宛遠遣使獻漢而樓蘭王使人盜取所獻之物大宛等使所獻也樓蘭既殺漢使又殺諸國使者甚逆天理平樂監傅介子

持節使誅斬樓蘭王安歸首懸之北闕以直報怨論語

以直報怨以德報德言怨於我不煩師眾其封介子者則直道而報之故詔引之也

為義陽侯食邑七百戶士刺王者皆補侍郎

宣帝本始元年論定策功益封大將軍光萬七千戶

車騎將軍光祿勳富平侯安世封益萬戶丞相陽平

侯義度遼將軍平陵侯明友前將軍龍額侯增太僕

建平侯延年太常蒲侯昌諫大夫宜春侯譚當塗侯

平杜侯屠耆堂長信少府關內侯勝邑戶各有差封

御史大夫廣明為昌永侯後將軍充國為營平侯大

司農延年為陽城侯少府樂成為爰氏侯光祿大夫

遷為平丘侯賜右扶風德典屬國武廷尉光宗正德

大鴻臚賢詹事畸光祿大夫吉京輔都尉廣漢爵皆

關內侯德武食邑

舊關內侯無邑也以蘇武守節外國劉德宗室俊彥故特令食邑又

傳云帝即褒賞大臣田延年以定策安宗廟益戶三千三百與始封所食邑凡四千三百戶詔有司論定策功大司馬大將軍光功德過太尉絳侯周勃車騎將軍安世丞相楊敞功比丞相陳平前將軍韓增御史大夫蔡誼功比穎陰侯灌嬰太僕杜延年功比朱虛侯劉章後將軍趙充國大司農田延年少府史樂成功比典客

劉揭遂封侯

地節四年霍氏誅下詔曰大司馬禹與母顯及從昆

弟諸壻謀為大逆男子張章先覺發以語期門董忠

忠告左曹楊惲惲告侍中金安上惲召見對狀後章

言其上發之意

上書以聞侍中史高與金安上建發其事

遂成也皆讎有功也

無人

霍氏禁闔卒不得遂其謀也

其功相也

封章為博成侯忠高昌侯惲平通侯安上都

成侯高樂陵侯

安上為侍中頗與發舉楚王延壽反謀賜爵關內侯食邑三百戶後霍氏

反安上傳禁門闔無內元帝元光二年秋隴西羌多姐旁種反以光祿勳馮

奉世為右將軍擊之任千秋為奮武將軍以助焉羌

虜大破斬首數千級餘皆出走塞明年二月奉世還

京師更為上將軍光祿勳如故錄功拜爵下詔曰羌

虜桀黠賊吏民攻隴西府寺燔燒置亭

置謂直驛之所絕道

橋甚逆天道左將軍光祿勳奉世前將兵征討斬捕

首虜八千餘級鹵馬牛羊以萬數賜奉世爵關內侯食邑五百戶黃金六十斤將較三千餘人皆拜

成帝永始二年十二月詔曰前將作大匠萬年知昌陵卑下不可為萬歲居奏請營作建置郭邑妄為巧

詐積土增高多賦歛繇役興卒暴之作卒讀曰猝謂急也卒

徒蒙辜死者連屬屬音之欲反百姓罷極天下匱竭罷讀曰疲

匱空也竭盡也常侍閔前為大司農中丞數奏昌陵不可成

侍中衛尉長數白宜早止徙家反故處長淳于長也朕以

長言下閔章以衛尉長數白罷故因公卿議者皆合

長計首建至策閔典主省大費司農中丞主錢穀顧庸故謂典主民

以康寧閔前賜爵關內侯黃金百斤其賜長爵關內侯食邑千戶閔五百戶

三年十一月尉氏男子樊並等十三人謀反尉氏陳留之縣

殺陳留太守劫略吏民自稱將軍徒李譚等五人共

格殺並等皆封為列侯

哀帝以綏和二年四月即位六月詔曲陽侯根前以

大司馬建社稷策益封二千戶王根也建議立哀帝為太子太僕

宏陽侯舜輔道有舊恩益封五百戶王舜及丞相孔

光大司空沘鄉侯何武益封各千戶

後漢光武建武二年正月甲子吳漢率大司空王梁

建義大將軍朱祐大將軍杜茂執金吾賈復揚化將軍堅鐔偏將軍王霸騎都尉劉隆馬武陰識共擊檀鄉賊於鄴東鄣水上大破之降者十餘萬人帝使使者璽書定封漢為廣平侯食廣平斤漳曲周廣年凡四縣庚辰詔曰人情得足苦於放縱快須臾之欲忘慎罰之義惟諸將業遠功大誠欲傳於無窮宜如臨深淵如履薄冰戰戰慄慄日慎一日其顯効未酬名籍未立者大鴻臚趣上朕將差而錄之

六年二月大司馬吳漢拔胸獲董憲龐萌山東悉平諸將還京師置酒賞賜

是年竇融為涼州牧與弟奉車都尉友從弟太中大夫士共擊隗囂衆大潰城邑皆降帝高融功下詔以安豐陽泉蓼安安風四縣封融為安豐侯弟友為顯親侯遂以次封諸將帥武鋒將軍竺曾為助義侯武威太守梁統為成義侯張掖太守史苞為褒義侯金城太守庫鈞為輔義侯酒泉太守辛彤為扶義侯封爵既畢乘輿東歸悉遣融等西還所鎮

十三年夏四月大司馬吳漢自蜀還京師於是大饗

諸士班勞策勲

班布也謂編布勞來之其有功者以策書紀其勲也勞音力到反

功

巨增邑更封凡三百六十五人其外戚恩澤封者四

十五人

明帝永平十三年男子燕廣告楚王英有逆謀英自殺於是封燕廣為折姦侯

周澤為太常後北地太守廖信廖音力 孚反坐貪穢下獄

沒入財產明帝以信藏物班諸廉吏唯澤及光祿勳

孫堪大司農嘗冲特蒙賜焉是時京師翕然在位者

咸自勉勵

章帝建初元年耿恭為戊巳校尉北匈奴圍之恭固

守漢遣兵迎之及恭至雒陽鮑昱奏恭節過蘇武宜

蒙爵賞於是拜為騎都尉以恭司馬石修為雒陽市

丞張封為雍營司馬軍吏范羌為其丞共今衛州 共城縣餘

九人皆補羽林恭母先卒及還追行喪制有詔使五

官中郎將齎牛酒釋服

和帝永元二年七月車騎將軍竇憲既破北單于乃

振旅還京師于是大開倉府勞賜士吏其所將諸郡

二千石子弟從征者悉除太子舍人

安帝永初二年西羌零昌種眾寇益州遣中郎將尹

就將南陽兵因發益部郡諸屯兵擊零昌黨吕叔都

等至秋蜀人陳省羅橫應募刺殺叔都皆封侯賜錢

五年鄧遵募上郡全無種羌雕何等刺殺狼莫賜雕

何為羗侯封遵武陽侯三千戶

其年漢陽人杜琦及弟季貢同郡王信等與羗通謀聚入上邽城琦自稱安漢將軍於是詔購募得琦首者封列侯賜錢百萬羗胡斬琦者賜金百斤銀二百斤漢陽太守趙博遣刺客杜習刺殺琦封習討姦侯賜錢百萬

順帝初為太子安帝延光三年車騎將軍閻顯中嘗侍江京等構陷帝廢為濟陰王明年北鄉侯薨中嘗侍孫程等迎帝於德陽殿西鍾下即位近臣尚書以下從輦幸南宮者皆增秩賜布各有差

郭鎮為尚書及中黃門孫程誅江京等立帝鎮率羽林士擊殺閻景以成大功再遷尚書令太傅三公奏尚書鎮冒犯白劔手刃賊臣姦黨於滅宗廟以寧功比劉章章齊王肥子也高帝孫誅諸呂有功封朱虛侯宜顯爵土以勵忠貞乃封鎮為定穎侯食邑二千戶

桓帝延熹二年八月詔曰梁冀姦暴濁亂王室孝質皇帝聰敏早茂冀心懷忌畏私行殺毒永樂太后親尊莫二和平元年有司奏太后所居皆以永樂為稱置官屬太僕少府焉冀又過絕禁還京師使朕離母子之愛隔顧復之恩禍害深大罪釁日滋賴宗廟之靈及中嘗侍單超徐璜具瑗左

棺唐衡尚書令尹勲等激憤建策內外協同漏刻之間
 桀逆梟夷斯誠社稷之祐臣下之力宜班慶賞以
 酬忠勲其封超等五人為縣侯勲等七人為亭侯
 獻帝建安元年車駕歸洛陽封衛將軍董承輔國將
 軍伏完侍中丁冲种輯尚書僕射鍾繇尚書郭溥御
 史中丞董分彭城相劉艾馮翊韓斌東郡太守楊眾
 議即羅郡伏德趙縻等十三人為列侯賞有功也
 魏大祖以建安十二年春二月下令曰吾起義兵誅
 暴亂於今十九年所征必克豈吾功哉乃賢士大夫
 之力也天下雖未悉定吾當要與賢士大夫共定之

而專饗其勞吾何以安焉其促定功行封於是大封
 功臣二十餘人皆為列侯其餘各以次受封及復歲
 事之孤輕重各有差太祖曰忠正密謀撫寧内外文
 若是也公達其次也文若增邑千戶合二千戶公達
 增邑四百并前七百戶太祖自柳城還過攸舍稱述
 攸前後謨謀勞勲曰今天下
事略已定矣孤願與賢士大夫共享其勞昔高祖使
 張子房自擇邑三萬戶今孤亦欲君自擇所封焉
 轉為中軍師文若荀彧
 公達荀攸

文帝黃初四年八月論征孫權功諸將已下進爵增
 戶各有差

明帝太和二年四月己巳論討諸葛亮功封爵增邑

各有差亮初出祁山盪寇將軍張郃位特進遣督將軍拒亮將馬謖於街亭謖依阻南山不下搃城郃絕其汲道擊大破之南安天水安定郡反應亮郃皆破平之詔曰賊將以巴蜀之衆當虓虎之帥將軍被堅執銳所向克定朕甚嘉之益邑千戶并前四千三百戶

景初二年司馬宣王征公孫淵遼東郡縣悉平錄討淵功宣王以下增邑封爵各有差又以遼東平定以參謀之功各進爵中書監劉放方成侯中書令孫資中都侯

高貴鄉公甘露二年五月己卯詔曰諸葛誕造攝逆亂迫協忠義平寇將軍臨渭亭侯龐會騎督偏將軍路蕃各將左右斬門突出忠莊勇烈所宜加異其進會爵鄉侯蕃封亭侯六月大論淮南之功封爵行賞各有差

陳留王景元四年西蜀譙周說劉禪降魏劉氏無虞一邦蒙賴周之謀也時晉文王為相國以周有全國之功封陽城亭侯

咸熙元年七月癸巳詔曰前逆臣鍾會構造反亂聚集征行將士劫以兵威始吐姦謀發言桀逆逼脅衆

人皆使下議倉卒之際莫不驚懾相國左司馬夏侯和騎士曹屬朱撫時使在成都中領軍司馬賈輔郎中羊琇各參會軍事和琇撫皆抗節不撓拒會凶言臨危不顧詞旨正烈輔語散將王起說會姦逆凶暴欲殺將士又云相國已率三十萬衆西行討會欲以稱張形勢感激衆心起出以輔言宣語諸軍遂使將士益懷奮勵宜加顯寵以彰忠義其進和輔爵爲鄉侯琇撫爵關內侯起宣傳輔言告令將士所宜賞異其以起爲部曲將

晉武帝泰始六年涼州爲虜所沒帝臨朝歎曰誰能爲我討此虜乎司馬督馬隆曰臣能平之公卿僉曰不可從也帝弗納以隆爲武威太守隆西渡溫水轉戰千里殺傷以千數自隆之西音聞斷絕朝廷憂之或謂已沒後隆使夜到帝撫掌歡笑詰朝召羣臣謂曰若從諸卿言是無秦涼也乃詔曰隆以偏師寡衆奮不顧難冒險能濟其假節宣威將軍加赤幢曲蓋鼓吹涼州旣平朝議將加隆將士勲賞有司奏隆將士皆先加顯爵不應更授衛將軍楊珣駁曰萌精募將士少加爵命者此適所以爲誘引今隆萌軍獨尅西土獲安不得便以前授塞此後功宜皆聽許以明

要信乃從玅議賜爵加秩各有差

太康元年平吳下詔曰使持節都督揚州諸軍事安東將軍京陵侯王渾督率所統逐逼秣陵令賊孫皓救死自衛不得分兵上赴以西軍之功又摧大敵獲張悌使皓塗窮勢盡面縛乞降遂平定秣陵功勲茂著其封八千戶進爵爲公封子澄爲亭侯弟湛爲關內侯賜絹八千匹轉征東大將軍王濬爲東平將軍縛吳孫皓送京師以濬爲安東將軍爲王渾所嫉及濬至京都有司奏濬表旣不列前後所被七詔月日又赦後違詔不受渾節度大不敬付廷尉科罪詔曰

濬前受詔徑造秣陵後乃下受渾節度詔書稽留所下不至便令與不受詔同責未爲經通濬不即表上被渾宣詔此可責也濬有征伐之勞不足以一眚掩之有司又奏濬赦後燒賊船百三十五艘輒勅付廷尉禁推詔曰勿推拜濬輔國大將軍領步兵較尉舊較唯五置此營自濬始也有司又奏輔國依此未爲違官不置司馬不給官騎詔依征鎮給五百大車增兵五百人爲輔國營給親騎百人官騎十人置司馬爲襄陽縣侯邑萬戶封子彝陽鄉亭侯邑千五百戶賜絹萬匹又賜衣一襲錢三十萬及食物又詔曰廣

武將軍唐彬受任方隅東禦吳寇南臨蠻越撫寧疆場有禦綏之績又每慷慨志在立功頃者征討扶疾奉命首啓戎行獻俘授馘勲効顯著其以彬爲右將軍都督巴東諸軍事徵拜翊軍較尉改封上庸縣侯食邑六千戶賜絹六千匹又詔曰尚書關內侯張華前與故太傅羊祜共創大計遂典掌軍事部分諸方筭定權略運籌決勝有謀謨之勲其進封爲廣武縣侯增邑萬戶封子一人爲亭侯千五百戶賜絹萬匹於是論功行封賜公卿以下帛各有差

明帝太寧二年王敦平以王導爲始興郡公邑三千

戶賜絹九千匹丹陽尹溫嶠建寧縣公尚書卞壺建興縣公中書監庾亮永興縣公北中郎將劉遐泉陵縣公奮武將軍蘇峻邵陵縣公邑各一千八百戶絹各五千四百匹尚書令郗鑒高平縣侯護軍將軍應詹觀陽縣侯邑各千六百戶絹各千八百匹建威將軍趙裔湘南縣侯右將軍卞敦益陽縣侯邑各千六百戶絹各三千二百匹其餘封賞各有差

成帝咸和四年蘇峻平三月壬子以征西大將軍陶侃爲太尉封長沙郡公車騎將軍郗鑒爲司空封南昌縣公平南將軍溫嶠票騎將軍開府儀同三司封

始安郡公其餘封拜各有差右光祿大夫陸曄不以
凶威變節加衛將軍給千兵百騎又以勲進爵爲公
封次子嘏新康子

孝武太元十年論淮淝之功追封謝安廬陵郡公封
謝石南康公謝玄康樂公謝琰望蔡公桓伊永修公
自餘封拜各有差

安帝義熙十年十月桓玄敗車駕反正論興復之功
封車騎將軍劉裕爲豫章郡公撫軍將軍劉毅南平
郡公右將軍何忌安成郡公自餘封賞各有差

十一年論平蜀功封劉義隆彭城公朱齡石豐城公
後魏道武登國二年正月班賜功臣長孫嵩等七十
三人各有差

三年六月北征康莫奚大破之獲其四部雜畜十餘
萬渡弱落水班賞將士各有差

六年十月北征蠕蠕追之及於大磧南林山下大破
之班賜從臣有差

十年十月大破慕容寶衆於參合陂班賞大臣將較
各有差

孝文大和六年二月癸丑賜王公以下清勤著稱者
穀帛有差

宣武景明初傅永爲汝陽鎮將時裴叔業將以壽春歸國密通於永永具表聞及將迎納詔永爲統軍與楊大眼奚康生等諸軍俱入壽春同日而永在後故康生大眼二人並賞列士永唯加清河男

前廢帝普泰元年八月庚子詔隴西王爾朱光天下文武討宿勤明達者泛三級

後廢帝中興元年十月齊獻武王大破爾朱兆於廣阿虜其卒五千餘人詔將士泛五級畱守者一級二年齊獻武王拔鄴擒刺史劉誕詔諸將士泛四級封侯增邑九十七人各有差

後周武帝建德五年十二月以平齊諸有功者封授各有差

六年二月論定齊諸軍勳置酒於齊太極殿會軍士以班賜有差王勇本名胡仁爲衛大將軍殷州刺史邛山之戰勇率敢死之士三百人並執短兵大呼直進出入衝擊殺傷者甚多敵人無敢當者是役也大軍不利唯勇及王文達耿令貴三人力戰皆有殊功帝於是賞帛二千匹令自分之軍還皆拜上州刺史以雍州岐州北雍州擬授勇等然州頗有優劣又令探籌取之勇遂得雍州文達得岐州令貴得北雍州

仍賜勇名爲勇令貴名豪達名傑以彰其功
隋文帝時段達爲車騎將軍高智惠李勣之亂達率
衆一萬擊方淦二州賜縑千段遷儀同又破汪文進
於宣州加開府賜奴婢五十口綵絹四千段
煬帝時突厥圍馬門鴻臚少卿蘇憂於鎮城東南爲
弩樓東箱獸圈一夕而就帝見善之以功進位通議
大夫

册府元龜

